
Biografija

Ajanović Almir rođen je 24.11.1975.godine u Sarajevu. Kao šesnaestogodišnjak oformio je grupu "Staklena zvona" u Vogošći i u trenutku kada su se spremali da uđu u studio i počnu rad na pjesmama u tome ih je osujetio rat. Rat ga je protjerao u Švedsku gdje je nastavio da se bavi muzikom i završio tamošnje ugledne škole za muzičke producente. Sa tamošnjim muzičarima osnovao je novu verziju grupe "Staklena zvona" i svirao širom Švedske.

Od 2002.godine počinje da živi na relaciji Bosna i Hercegovina - Švedska i nastavlja domaću pop karijeru. Tada se pojavljuju pjesme "Sve što imam ja", "Gdje si ti" i "Dođi do mene". Na ovu posljednju je uradio i video spot i zahvaljujući njoj publika je saznala za njega. U to vrijeme je još nastupao pod imenom "Staklena zvona" iako je bilo jasno da je u toj priči on ključna osoba. Naredne 2003.godine nastupio je na festivalu u Bihaću sa pjesmom „Oprosti mi”, još uvijek pod firmom „Staklena zvona”. Krajem 2003.godine odlučuje da nastavi pod vlastitim imenom, pa dodaje imenu i ono „Don” i u ranu jesen 2004.godine objavio je kao Don Almir svoj debi album „Moja duša bosanska” za Muzičku produkciju Javnog RTV servisa. Zanimljivo je da je to posljednji album koji je producirao legendarni Slobodan Bodo Kovačević. Na albumu su ponovljene od ranije poznate „Dođi do mene” i „Oprosti mi”, ali posebno su se izdvojile „Odlazi”, „Ako umrem mlad”, „Sarajevo”, „Moja duša bosanska” i „Sve što sada želim”. Paralelno sa izvođačkom gradio je i autorsku i producentsku karijeru kroz vlastiti studio „Tempo” čiji je i vlasnik.

Što se tiče izvođačke karijere tokom 2005. i 2006. godine fokusirao se na festivale. Tako je u ljeto 2005.godine ponovo nastupio na festivalu u Bihaću sa pjesmom „Samo bol”, a naredne godine je na istom mjestu dobio Prvu nagradu publike za duet sa Hankom Paldum u pjesmi „Ja nemam snage”. Iste godine je nastupio i na bosanskohercegovačkom radio-televizijskom festivalu sa pjesmom „Ostani”. Sa pjesmom „Ja nemam snage” osvojio je nagradu za najbolji tekst i na festivalu u Novom Pazaru. U periodu od 2007. do 2009.godine djelovao je kao izvršni producent festivala narodne muzike „Vogošća” te je solističku karijeru malo ostavio po strani. Ipak je 2008.godine izašao njegov drugi studijski album „Ako je suđeno da”. Sa tim albumom ponovio je uspjeh debi albuma, a posebno su se ovaj put izdvojile pjesme „Ako je suđeno da”, „Nema moje drage”, „Ne daš mi da te zaboravim”, „Laganim korakom” i „Starac na cesti”. Sve više se, nakon toga, počeo okretati producentskom radu, a vlastitu karijeru je sveo na povremeno pojavljivanje na festivalima i objavljivanje po

jednog singla godišnje. Tako je 2010.godine nastupio na bosanskohercegovačkom radio-televizijskom festivalu sa pjesmom „Volim te do grijeha”. U 2011.godini je ponudio pjesmu „Ateriraj”, a u jesen naredne, 2012.godine i singl „Bio sam ti drag”.

Almir je jedan od najpoznatijih bosanskohercegovačkih autora i kompozitora. Napisao je i komponovao preko 200 pjesama za renomirana imena iz naše zemlje ali i regiona. Almir Ajanović je i autor pjesme koja će ove godine predstavljati Bosnu i Hercegovinu na Eurosongu 2016. u Štokholmu. Svoj doprinos muzičkoj djelatnosti u Bosni i Hercegovini u zadnjem periodu daje i kao predsjednik Upravnog odbora kolektivne organizacije za zaštitu prava izvođača muzičkih dijela AIS.

Diskografija: „Moja duša bosanska” 2004 (MP JRTS)

”Ako je suđeno da” 2008 (Hayat Production)